

BOSNA I HERCEGOVINA
Federacija Bosne i Hercegovine
UNSKO – SANSKI KANTON
Skupština



BOSNIA AND HERZEGOVINA
Federation of Bosnia and Herzegovina
UNA – SANA CANTON
Assembly

Poslanička pitanja

sa XII redovne sjednice Skupštine Unsko – sanskog kantona
koja je održana 09.11.2015. godine

Bihać, 09. novembar 2015. godine

Predsjedavajući Skupštine Unsko – sanskog kantona, Nijaz Hušić:

Ja molim sve zastupnike koji imaju spremljena poslanička pitanja za danas da prijave svoja poslanička pitanja. Prvi za zastupničko pitanje danas se prijavio kolega Samir Muminović. A neka se pripremi kolega Nisvet Jusić.

Poslanik Samir Muminović:

Poštovano Predsjedništvo, gospodine Premijeru, članovi Vlade, kolegice i kolege poslanici i ostali gosti, selam alejkum i dobar dan.

Pa evo ja ću ponovo postaviti svoje pitanje koje sam postavio prije nekoliko mjeseci i nisam dobio odgovor, ne znam iz kojeg razloga, a smatram da je bitno i da se tiče aktualnog stanja u kantonalnoj bolnici. Evo dvije godine su kako se desio taj nesretni požar u kantonalnoj bolnici i čini mi se da se vrlo malo radilo povodom toga. U tom požaru stradali su odjel hirurgije, odjel urologije, odjel ortopedije i operacioni trakt. Oni su najviše stradali. Taj požar je nanio štetu čitavoj bolnici i u svakom segmentu rad bolnice je na neki način poremećen. Ti odjeli koji su tad stradali, oni su izmješteni u neadekvatne prostore i dan danas se nalaze u tim prostorima. Tada je kao što se i moralo, organiziran rad u tim prostorima, funkcionisali su ti odjeli, međutim to je improvizacija rada. Bilo je planirano da će se to odvijati par mjeseci, a nije se smatralo da će se taj period mjeriti godinama. Tad nakon požara je formirana komisija za procjenu štete, koja je sve realno popisala i procjenjena šteta od požara u kantonalnoj bolnici je bila 1.300.000 maraka. Svi smo svjedoci da je tad čitava država, pa čak i region, krenuli da doniraju sredstva da bi se pokrenuo rad u našoj bolnici. Iz tih doniranih sredstava, a ja ću zahvaliti svim donatorima, pa ću ih malo i nabrojati, a to je Vijeće ministara 100.000, Vlada Federacije 500.000, Vlada kantona 300.000, Islamska Zajednica iz sergije po džamijama 203.000, Općina Centar Sarajevo 50.000, Meggle 100.000, Pliva 50.000, Općina Karlovac 20.000, pa tek onda oni mali svi naši građani, radnici, poslanici, vijećnici i tako dalje. Znači skupljena je suma koja je puno veća bila nego što je šteta od požara bila. I šta je sad, odjeli su i dalje izmješteni, odjeli i dalje pružaju neadekvatnu zdravstvenu zaštitu našim građanima, a para nema. Jedino pozitivno u tome što sad primijetimo, da stvarno velike napore ulaže direktor i menadžment bolnice da ponovo skupljamo sadaku da rješavamo te prostore i da ih adekvatno renoviramo. Moje pitanje je bilo prošli put, a i sada je:

Gdje su potrošena sredstva koja su donirana za sanaciju štete od požara?

Ako su potrošena, da li su potrošena na adekvatan način i u skladu s onim za šta su skupljana?
Ako nisu potrošena, da li ona još postoje i zašto se ne iskoriste da saniraju štetu od požara?

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Nisvet Jusić. A neka se pripremi Sanel Mahić.

Poslanik Nisvet Jusić:

Uvaženi članovi radnog Predsjedništva, kolegice i kolege poslanici u Skupštini Unsko – saskog kantona, uvaženi Premijeru, ministri u Vladi, predstavnici međunarodnih institucija, medija, građanke i građani Unsko – saskog kantona, eselamu alejkum i dobar dan.

Za današnju sjednicu podnijecu jednu poslaničku inicijativu i postaviti jedno poslaničko pitanje.

Inicijativa koju upućujem Direkciji regionalnih cesta Unsko – saskog kantona Bihać, kojom tražim od Direkcije regionalnih cesta Unsko – saskog kantona da u plan investicija za 2016. godinu uvrsti izradu projekta rekonstrukcije trase regionalnog puta R 401 B koji povezuje općinu Bužim sa ostatkom Unsko – saskog kantona.

Obrazloženje:

Imajući na umu da je u toku kreiranje budžeta i planova rada svih kantonalnih institucija za 2016. godinu tražim da se prioritetno planiraju sredstva za izradu projekta rekonstrukcije regionalnog puta R 401 B. Izradom projekta rekonstrukcije ovog puta stvaraju se preduvjeti za kvalitetno investiranje kojim bi u konačnici općina Bužim na primjeren način bila povezana sa ostatkom Unsko – saskog kantona. Loša saobraćajna povezanost jedan je od razloga nedovoljnog privrednog razvoja općine Bužim u posljednjih 20 godina. Danas su svi putni pravci koji vode prema Bužimu u katastrofalno lošem stanju. To je zajednička sramota svih institucija zadnjih 20 godina. Svakodnevno čujemo lijepe vijesti kako će Bosna i Hercegovina iz Evropskih fondova dobiti značajna sredstva za razvoj putne infrastrukture. Osnovni preduvjet za rekonstrukciju ili izgradnju bilo kojeg putnog pravca jeste postojanje projektne dokumentacije. Uvjeren sam da će Direkcija regionalnih cesta Unsko – saskog kantona shvatiti dobronamjernost ove inicijative, istu uvažiti i dostaviti u Skupštinu Unsko – saskog kantona i meni lično povratnu informaciju o poduzetim aktivnostima. Samo ću napomenuti da postojeća trasa sa gabaritima iste ceste apsolutno ne odgovara kapacitetu regionalnog puta.

Poslaničko pitanje upućujem na osnovu Poslovnika o radu Skupštine, Član 190. Upućujem poslaničko pitanje BH Telecom DOO Sarajevo Regionalnoj Direkciji Bihać.

Kada će dioničko društvo BH Telecom izvršiti postavljanje uplatnih mijesta u svim općinama Unsko – saskog kantona kako bi građani mogli redovno bez dodatne naknade, odnosno provizije, vršiti uplate svojih računa?

Obrazloženje:

Građani sa područja općine Bužim, korisnici usluga BH Telecoma, u više navrata izrazili su nezadovoljstvo zbog činjenice da prilikom plaćanja svojih računa dodatno moraju platiti naknadu provizije po svakom računu. Polazeći od činjenice da su građani do nedavno iste račune plaćali bez provizije u poslovnicama pošte, veliki broj njih izražava negodovanje zbog promjene koja je uslijedila. Dioničko društvo BH Telecom otvorilo je vlastite centre u većini gradova Unsko – saskog kantona u kojim građani pored ostalih usluga mogu i dalje bez dodatne naknade plaćati svoje račune. Takvi centri po mojim saznanjima nisu otvoreni u

Bužimu i Velikoj Kladuši. Imajući na umu opredjeljenje BH Telecoma da razvija partnerske odnose sa svojim klijentima, smatram da bi u svim općinama Unsko – sanskog kantona trebali postaviti barem jedno naplatno mjesto Telecom centar te time omogućiti građanima iz svih općina Unsko – sanskog kantona da bez naknade mogu uplaćivati svoje račune.

Zahvaljujem.

Predsjedavajući Skupštine Unsko – sanskog kantona, Nijaz Hušić:

Zahvaljujem. Sanel Mahić. A za zastupničko pitanje neka se pripremi kolega Albin Muslić.

Poslanik Sanel Mahić:

Dame i gospodo sve vas srdačno selamim i pozdravljam.

Moje danas poslaničko pitanje je upućeno Kantonalnom Tužilaštvu Unsko – sanskog kantona.

Naime, u skladu sa Članom 190 poslovnika o radu Skupštine Unsko – sanskog kantona postavljam slijedeće poslaničko pitanje:

Da li su istiniti navodi koji su se pojavili u elektronskim medijima o izmještanju identifikacionog centra Šeikovača iz Sanskog Mosta u Bihać i ukoliko jesu ko je predlagatelj ove inicijative i koji su razlozi za njeno pokretanje?

Obrazloženje:

Identifikacioni centar Šeikovača godinama je služio kao mjesto za smještaj ekshumiranih tijela i skeleta, ostataka žrtava genocida pronađenih u masovnim grobnicama iz doline rijeke Sane. Kako su najvećim dijelom u ovom centru smješteni posmrtni ostaci ljudi iz Prijedora i Sanskog Mosta, izmještanje ovog centra u Bihać prouzrokovalo bi dodatne troškove porodicama žrtava i pored sve pretrpjele boli, značilo bi i dodatni finansijski udar. Obzirom da je nemoguće utvrditi vremenski period u kojem će se ekshumirati posmrtni ostaci sa ovih područja, neophodno je iznaći mogućnost za adaptaciju postojećih prostorija identifikacionog centra Šeikovača.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Albin Muslić. A za poslaničko pitanje neka se pripremi kolega Keserović.

Poslanik Albin Muslić:

Uvaženi Predsjedavajući, dopredsjedavajući, kolegice i kolege poslanici, ministri u Vladi Unsko – saskog kantona, Premijeru, predstavnici nevladinog sektora, medija, uvaženi građani.

Imam dva poslanička pitanja i oba su usmjerena prema Vladi Unsko – saskog kantona.

Prvo pitanje, zamoljen od porodice Halkić, odnosi se na to šta Vlada kantona i resorno ministarstvo obrazovanja, nauke, kulture i sporta misli učiniti u pogledu nezakonitog otkaza ugovora o radu, dakle koji se desio 2004. godine prema uposleniku Univerziteta u Bihaću, na Bio – tehničkom fakultetu, dakle doktoru nauka Halkić Esadu iz Bihaća?

Budući da je otkaz ugovorom o radu definiran odlukom broj: 03 – 501/04 od 20.07.2004. godine, te da je po donošenju te odluke uslijedio sudski postupak u kojem je konstatirano da je navedena odluka nezakonita, istom dakle dosuđene su i dakle plate za onaj period od donošenja odluke o otkazu pa do donošenja presude. I u tom smislu, budući da se radi o više desetina hiljada konvertibilnih maraka, a istovremeno gospodin Halkić Esad se obraćao i Premijeru kantona i ministru obrazovanja, nauke, kulture i sporta, kao i ministrici pravosuđa i uprave, jedina od ovih napred navedenih je ministrica pravosuđa i uprave razgovarala sa gospodinom Halkić Esadom i rekla je da će se založiti za rješavanje njegovog problema. Neprejudicirajući konačni ishod ovoga spora koji se dakle vodi, molim da se da obrazloženje na koji način misli se, misli Vlada kantona riješiti ovaj problem.

I drugo pitanje takođe odnosi se prema Vladi Unsko – saskog kantona. A to je:

Šta namjerava Vlada Unsko – saskog kantona uraditi u cilju bolje zastupljenosti kantona kada je u pitanju buduća izmjena zakonodavstva o pripadnosti javnih prihoda?

Na početku našeg mandata mi smo bili svjedoci jedne građanske inicijative koja je upućena i prema Zakonodavno – pravnoj Komisiji ove dakle Skupštine i Zakonodavno – pravna Komisija je tretirala ovu inicijativu i zaključila da se treba pod hitno navedeni zakon na nivou dakle Federacije Bosne i Hercegovine pomijeniti. I u tom smislu u proteklom periodu, posebno u proteklih nekoliko dana svjedoci smo određenih razgovora na temu izmjena zakonodavstva u ovom dakle domenu, ali isto tako i određenih protesta brojnih kantona, posebno Kantona Sarajevo koji su nezadovoljni sa mogućom izmjenom, što bi značilo smanjivanje njima prihoda dakle prema budžetu Kantona Sarajevo. U tom smislu pitam šta je Vlada kantona uradila po ovom pitanju i da li će se položaj kantona popraviti kroz buduće izmjene zakonodavstva o pripadnosti javnih prihoda, budući da od tog zakonodavstva nama itekako ovise prihodi koji se opet, dakle služe za finansiranje brojnih potreba svih građana Unsko – saskog kantona?

Hvala lijepa.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kenan Keserović. A Farko Hodžić neka se pripremi za zastupničko pitanje.

Poslanik Kenan Keserović:

Dobar dan, pozdravljam sve prisutne.

Za današnju sjednicu ja ću imati jednu inicijativu i poslaničko pitanje.

Naime, na temelju Člana 84. Poslovnika Skupštine Unsko – sanskog kantona upućujem inicijativu za uvođenje posebne budžetske linije za razvoj omladinskog poduzetništva u Unsko – sanskom kantonu u okviru ministarstva privrede u budžetu za 2016. prema Vladi USK-a i Ministarstvu privrede Unsko – sanskog kantona. Naime, na devetoj redovnoj sjednici održanoj 24.07.2015. godine, u sklopu rasprave po tački dnevnog reda Informacija o stanju u oblasti privrede za 2014. godinu iz nadležnosti Ministarstva privrede USK-a, ova Skupština je prihvatila zaključke koje sam uložio, a između ostalog izdvajam zaključak da se kroz rebalans budžeta za ovu godinu i budžet za 2016. godinu u okviru Ministarstva privrede USK-a uvede posebna budžetska linija za razvoj omladinskog poduzetništva u Unsko – sanskom kantonu na temelju dobre prakse koju su uvele pojedine općine u Bosni i Hercegovini. Znamo da direktna finansijska ali i savjetodavna pomoć koje ovo ministarstvo može pružiti mladima je ključna za dugoročno rješavanje njihovih najvećih problema, kao što je nezaposlenost. Obzirom da je prošlo gotovo četiri mjeseca od donošenja zaključaka, a znamo da je Vlada 06.11.2015. godine usvojila nacrt budžeta, odnosno Prijedlog Odluke o izmjenama i dopunama budžeta za 2015 godinu i Nacrt budžeta za 2016 je donešen 27.10.2015. godine, prema mojim informacijama kojim raspolažem, da ovo nije sadržano obzirom na donešene zaključke. Zato u ime mladih poduzetnika sa ovog kantona predlažem da se u što kraćem roku uvede posebna budžetska linija za razvoj omladinskog poduzetništva u okviru ministarstva za privredu i da bude sadržana u budžetu za 2016. godinu.

I imam jedno poslaničko pitanje, pitanje upućujem Kantonalnom Ministarstvu obrazovanja, nauke, kulture i sporta, znači ministru. Zamoljen sam u ime porodice Zulić, gdje mi se obratio gospodin Kadir Zulić, otac Ezane Zulić, inače djevojke sa poteškoćama u razvoju, zbog pravomoćne presude broj: 230mal00531412mal od 28.06.2013. godine kojom se obavezuje tuženi, znači Unsko – sanski kanton, da tužiteljici, malodobnoj Zulić Ezani iz Velike Kladuše na ime troškova za prevoz u školu i iz škole za školsku godinu 2005 – 2006, znači i 2006 – 2007, isplati ukupan iznos u iznosu od 2.060 konvertibilnih maraka sa zateznom kamatom počev od 10.09.2007. godine pa do isplate, te da naknadi znači parnične troškove u iznosu 700 konvertibilnih maraka a sve u roku od 15 dana od dana pravosnažnosti presude. Što nije izvršeno znači ni do danas.

(PREKID POSLANIČKOG PITANJA)

Predsjedavajući Skupštine Unsko – sanskog kantona, Nijaz Hušić:

Privodite kraju.

Poslanik Kenan Keserović:

Obzirom da kod Ezane postoji potpuna nesposobnost, evo završavam, znači potpuna nesposobnost za samostalan život, ja molim i pitam konkretno, da li će se izvršiti navedena presuda i na taj način ispraviti ovu dugogodišnju diskriminaciju i grešku prema ovoj djevojci koja je to zaslužila.

Zanima me tačan rok i kad?

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Farko Hodžić. A neka se pripremi Amir Murić.

Poslanik Farko Hodžić:

Poštovani.

Ja ću dva poslanička pitanja. Bili smo svjedoci da je rudnik Kamengrad, evo dobila je firma LAGER koncesiju, oni su uplatili već 500.000 maraka na ime koncesione naknade i meni je drago da će se otpočeti, da će dio ljudi zaustaviti iseljenje, odnosno da će naći tu posao. Međutim, ja želim da uputim ovo pitanje i Vladi i ministarstvu privrede i Kantonalnoj Direkciji za ceste. Naime, put R 405, mislim da je ubjedljivo najgori regionalni put na Unsko – sanskom kantonu, to je put koji spaja Sanski Most i Bosansku Krupu. Doprinos u uništavanju tog puta upravo je teret koji se vozio iz rudnika mrkog uglja Kamengrad. S toga ja, malo prije je kolega postavio pitanje, ja znam da postoji projektna dokumentacija za sanaciju tog puta, a taj put su radili ljudi svojim doprinosom.

S toga, obraćam se i pitam, kada će se i hoće li se popraviti ikada taj put?

Da ljudi mogu bezbjedno da voze, a posebno da đaci mogu da idu u škole. To je jedno pitanje i molim da mi se dostavi odgovor.

Drugo pitanje. Slušajući gradsko vijeće Bihaća, čuo sam da nema više naknade BH Telecoma oko izvođenja određenih radova i tako dalje. Navodno i to je državno preduzeće pa nije dužno uplaćivati nikakve naknade. Iako grca u lovi. Našoj lovi. Prisutno je u današnje vrijeme iskopavanje razno raznih kanala, prekopavanje puteva, stavljanje određenih cijevi za optički kabal u naseljenim mjestima, tako da je mnogo puteva, što lokalnih, što raskrsnica i tako dalje, što uz same ivičnjake, devastirano i ne služi svojoj svrsi. Oni to nekako pijeskom nekim

saniraju, ali to za dva dana nastaju ogromne lokve i dolazi do opasnosti da se uništi i auto i tako dalje. Ko će onda nekome nadoknaditi štetu? S toga pitam i gradsko vijeće, a i BH Telecom:

Kada ćete i na koji način sanirati ono što ste napravili?

Hvala lijepo.

Predsjedavajući Skupštine Unsko – sanskog kantona, Nijaz Hušić:

Zahvaljujem. Amir Murić.

Poslanik Amir Murić:

Dame i gospodo, dobar dan.

Moje će pitanje biti usmjereno prema ministru zdravstva, rada i socijalne politike. Ja sam na ranijim sjednicama postavljao pitanje vezano za Dom Zdravlja u Bihaću i dobio sam odgovor i u odgovoru se ministar više bavi radom mene za vrijeme mog mandata nego što se bavi svojim mandatom, pa ću mu postaviti direktno pitanje:

Zašto je kako je on ministar zdravstva, rada i socijalne politike, prekršen više puta Zakon o zdravstvenoj zaštiti i imenovani vd direktori i direktori koji ne ispunjavaju uslove po zakonu o zdravstvenoj zaštiti, to se odnosi i na Dom Zdravlja u Bihaću i moje pitanje je kad je istekao mandat direktorici, ustvari vd direktorici Doma Zdravlja u Bihaću, kad znamo da je prije nje bio direktor u mandatu, doktorica Azra Čehić i koja je smjenjena po odluci upravnog odbora, a imenovana je druga koja ne ispunjava uslove i kojoj je istekao mandat po mom saznanju prošli mjesec?

I evo u odgovoru stoji da će biti raspisan novi konkurs 09.11. A prvi konkurs koji je bio raspisan nije bio raspisan u skladu sa Zakonom o zdravstvenoj zaštiti.

Moje drugo pitanje se odnosi na istu ustanovu.

Želim da mi se dostave informacije koliko je Dom Zdravlja u Bihaću bio dužan 2011. godine dolaskom na mandat doktorice Azre Čehić, a koliko je bio dužan za vrijeme kad je Azra Čehić smjenjena i stavljena vd direktorica, mimo zakona, u Domu Zdravlja u Bihaću?

Hvala.

Predsjedavajući Skupštine Unsko – sanskog kantona, Nijaz Hušić:

Željko Mirković. A neka se pripremi kolega Čufurović.

Poslanik Željko Mirković:

Gospodine Predsjedavajući, dopredsjedavajući, uvažene kolegice i kolege, predstavnici Vlade, medija, međunarodnih organizacija i dragi naši građani koji nas pratite putem Radio – Televizije Unsko – sanskog kantona, sve vas skupa pozdravljam.

Ja imam danas jedno poslaničko pitanje, koje ću sad postaviti u skladu sa Članom 190. Poslovnika Skupštine Unsko – sanskog kantona, a pitanje upućujem Federalnoj Upravi za inspeksijske poslove Sarajevo i Kantonalnoj Upravi za inspeksijske poslove Unsko – sanskog kantona sa sjedištem u Bihaću. Poslaničko pitanje glasi:

U interesu zakonitosti i pravednog tretmana svih prijavljenih kandidata na konkurs za prijem u radni odnos stručnog saradnika savjetodavca za zapošljavanje pri Birou rada Velika Kladuša, zahtijevam da provedete odgovarajući inspeksijski nadzor i utvrdite da li je procedura prijema u radni odnos u ovom slučaju provedena u skladu sa postojećom zakonskom regulativom, te da utvrdite koji kriteriji i elementi su korišteni u diskrecionoj ocjeni kandidata, što uključuje i odgovarajući zapisnik iz kojeg se vidi kako su svi kandidati rangirani, te da me obavijestite o rezultatima inspeksijskog nadzora.

Obrazloženje:

U posljednje vrijeme svjedoci smo sve češće upotrebe takozvanog diskrecionog prava direktora prilikom prijema u radni odnos i ignorisanja činjenice da je to pravo strogo ograničeno uslovima konkursa interesom da bude izabran kandidat koji će najuspješnije obavljati poslove upražnjenog radnog mjesta. Pri vršenju diskrecionog prava mora biti isključena samovolja kao način odlučivanja koji ne uvažava objektivne kriterije po svemu sudeći po rezultatima konkursa za prijem u radni odnos stručnog saradnika savjetodavca za zapošljavanje pri Birou rada Velika Kladuša, upravo je samovolja bila jedini kriterij za odlučivanje. Diskreciona ocjena ne može biti samovoljno djelovanje i korištenje ovlaštenja na nezakonit i zlonamjeren način, već izbor alternative u skladu sa potrebama konkretnog slučaja, pri tome poštujuću naročito zakonitost i legalitet, a zakonito vršenje diskrecione ocjene moguće je jedino ako je ispravno i cjelovito utvrđeno činjenično stanje, te ako se vodilo računa o pravima i transparentnosti postupka koji ima unaprijed jasno propisanu formu, a suprotno postupanje ima za posljedicu nezakonitost cjelog postupka. U konkretnom slučaju konkursna procedura i odabir kandidata vršen je na vrlo nejasan način, na što upućuju sve dostupne informacije, također ne može se zaključiti kojim se to kriterijima rukovodio direktor JU Služba za zapošljavanje USK-a prilikom donošenja odluke o prijemu u radni odnos zato što odluka ne sadrži nikakve razloge niti bodovnu listu iz koje se vidi kako su pojedini kandidati rangirani. Zbog čega je upravo izabrani kandidat dobio prednost u odnosu na kandidatkinju Amru Bajrić, te da li su poštovana prava i prednost Amre Bajrić kao nosioca prava predviđenih Zakonom o dopunskim pravima boraca i članova njihovih porodica, imajući u vidu da je Amra Bajrić dijete iz šehidske porodice.

Hvala lijepo.

Predsjedavajući Skupštine Unsko – sanskog kantona, Nijaz Hušić:

Zahvaljujem. Asmir Ćufurović.

Poslanik Asmir Ćufurović:

Uvaženi Predsjedavajući, Premijeru, ministri u Vladi Unsko – sanskog kantona, predstavnici međunarodne zajednice medija, kolegice zastupnice i kolege zastupnici, građani koji nas prate putem servisa Unsko – sanske Televizije, selam alejkum i dobar dan.

Ja ću u skladu sa Poslovníkom imati danas jedno zastupničko pitanje i jednu inicijativu. Pitanje upućujem Direkciji regionalnih cesta Unsko – sanskog kantona:

Da li je na regionalnom putu R 401 Velika Kladaša – Vrnograč – Bužim, na relaciji Velika Kladaša – Vrnograč, konkretnije oko mijesta Hajrat, u ovoj godini bilo investicionog održavanja u smislu krpanja rupa na kolovozu? Ako nije, da li su predviđene takve investicije na ovom putnom pravcu do kraja ove godine?

Obrazloženje:

U proteklom periodu na pomenutom putnom pravcu vidljivi su tragovi krpanja rupa, konkretno oko pomenutog mijesta hajrat, međutim kako smo svjedoci svakodnevno kao vozači da vidimo i vizuelno možemo pratiti kako se to radi, to u ovom slučaju nije tako. Ovo ističem zbog činjenice da se na pomenutoj lokaciji desilo bukvalno zasipanje asfaltom bez adekvatne pripreme, pa nekako promišljam da nije neko samoinicijativno izvršio sanaciju, jer dosadašnja praksa i način bio je bitno drugačiji.

Inicijativu podnosim prema Komisiji za pitanje zdravstva, boračka pitanja i socijalnu politiku Skupštine Unsko – sanskog kantona, ministarstvu zdravstva, rada i socijalne politike, Zavodu zdravstvenog osiguranja Unsko – sanskog kantona, kao i prema Fondu solidarnosti Federacije Bosne i Hercegovine.

Da se oboljelim od raka koji moraju obavljati kemoterapiju u Kantonalnoj Bolnici Bihać, pa i dalje, sa mjestom prebivališta udaljenim preko 30 km od Bihaća, obezbjedi pevoz vozilima nadležnog doma zdravlja. Ovo se posebno odnosi na pacijente osigurane preko centra za socijalni rad.

Obrazloženje:

S obzirom na zakonsku regulativu u smislu provođenja Zakona o zdravstvenoj zaštiti na području Unsko – sanskog kantona u smislu finansiranja ovog vida zdravstvene zaštite te problema s kojim se susreću oboljeli od karcinoma bilo koje vrste, te imajući u vidu da se radi o ljudima koji su u stanju socijalne potrebe, smatram da pomenute institucije trebaju riješiti problem koji ova inicijativa konkretizira, kako bi ovoj kategoriji ljudi koji su oboljeli od malignih bolesti na ovaj način olakšali i omogućili da lakše se nose sa ovim problemima. Problem malignih oboljenja u našem društvu sve je prisutniji, što je prepoznato od strane javnog zdravstva, ali na žalost ne postoji cjelovit i sveobuhvatan program koji bi ovaj problem

adekvatno tretirao. I zato ova inicijativa ima za cilj da pomogne najjranjivijoj kategoriji ljudi koji su pogođeni ovom bolešću. Prema podacima, samo na području općine Velika Kladuša, znači podaci Doma Zdravlja Velika Kladuša, samo na području Velike Kladuše imamo oko 180 slučajeva koji su oboljeli nekih od malignih oboljenja, a svaki četvrti završava smrtnim ishodom. S obzirom da se radi o socijalno ugroženoj populaciji ovaj vid pomoći je od primarnog značaja za ove kategorije.

Predsjedavajući Skupštine Unsko – sanskog kantona, Nijaz Hušić:

Zahvaljujem. Time smo iscrpili za danas zastupnička pitanja. Ja molim sve one kojima su ova pitanja upućena da u skladu sa rokom koji je predviđen Poslovníkom o radu Skupštine, pismeno odgovore na zastupnička pitanja.